



Broj predmeta: 02-12-000772/10  
Broj akta: 01.3-0208KM-20/11  
Datum, 26.4.2011. godine  
Mjesto, Brčko

Na osnovu člana 52. Statuta Brčko Distrikta Bosne i Hercegovine – prečišćeni tekst („Službeni glasnik Brčko Distrikta BiH“, broj 2/10), člana 10. i člana 11. stav (3) Zakona o Vladi Brčko Distrikta Bosne i Hercegovine („Službeni glasnik Brčko Distrikta BiH“, brojevi: 19/07, 36/07, 38/07, 2/08, 17/08, 23/08 i 14/10), a u vezi sa članom 85. stav (1), članom 87. stav (1), članom 88. stav (1), članom 89. stav (1) i članom 153. stav (2) tačka d) Zakona o prostornom planiranju i građenju („Službeni glasnik Brčko Distrikta BiH“, broj 29/08), na Prijedlog Odjeljenja za javnu sigurnost, broj: 02-12-000772/11 od 22. 12. 2010. godine, Vlada Brčko Distrikta BiH, na 91. redovnoj sjednici održanoj 24. i 30. marta 2011. godine, d o n o s i

## PRAVILNIK

### O ISPUNJAVANJU USLOVA PRAVNIH LICA ZA IZRADU TEHNIČKE DOKUMENTACIJE, REVIZIJE TEHNIČKE DOKUMENTACIJE, GRAĐENJA I NADZORA

#### DIO PRVI

##### Član 1. (Predmet)

Pravilnikom o ispunjavanju uslova pravnih lica za izradu tehničke dokumentacije, revizije tehničke dokumentacije, građenja i nadzora (u daljnjem tekstu: „Pravilnik“), utvrđuju se uslovi koje moraju ispunjavati pravna lica za obavljanje djelatnosti izrade tehničke dokumentacije, reviziju tehničke dokumentacije, građenje i nadzor, koja obavljaju djelatnost na teritoriji Brčko Distrikta Bosne i Hercegovine (u daljnjem tekstu: „Distrikt“).

##### Član 2. (Definicije)

Izrazi upotrijebljeni u Pravilniku imaju sljedeća značenja:

- a) „**kvalifikovani radnik građevinske struke**“ je lice koje ima treći stepen stručne spreme iz oblasti građevinarstva ili je rješenjem o raspoređivanju unutar pravnog lica raspoređeno na radno mjesto kvalifikovanog radnika građevinske struke neprekidno najmanje dvije godine u tom pravnom licu;
- b) „**kvalifikovani radnik odgovarajuće struke za instalacije**“ je lice koje ima treći stepen stručne spreme, kojim je osposobljen za vrstu instalaterskih radova za koje pravno lice traži odobrenje;

- c) „**rukovalac građevinskim mašinama**” je lice koje posjeduje dokaz da je osposobljeno za rukovanje građevinskim mašinama;
- d) „**kvalifikovani radnik odgovarajuće struke**” je lice koje posjeduje kvalifikaciju za određene završne radove za koje se zahtijeva odobrenje ili radnik koji je rješenjem o raspoređivanju unutar pravnog lica raspoređen na radno mjesto kvalifikovanog radnika odgovarajuće struke neprekidno najmanje dvije godine u tom pravnom licu;
- e) „**objekti složene konstrukcije**” su:
- 1) objekti visokih brana za koje je propisano tehničko osmatranje;
  - 2) hidroelektrane;
  - 3) termoelektrane;
  - 4) objekti vodosnabdijevanja kapaciteta većeg od 40 l/s;
  - 5) uređaji za prečišćavanje otpadnih voda kapaciteta većeg od 30 l/s;
  - 6) plovni kanali;
  - 7) teretna mehanizovana i javna putnička pristaništa;
  - 8) ribnjaci površine 50 ha;
  - 9) hidromelioracioni sistemi za navodnjavanje površina i za odvodnjavanje preko 300 ha;
  - 10) objekti za proizvodnju i preradu nafte i plina;
  - 11) objekti bazne i prerađivačke hemijske industrije, crne i obojene metalurgije,
  - 12) objekti za proizvodnju, preradu i oplemenjivanje ruda;
  - 13) objekti za proizvodnju celuloze i papira i objekti za preradu kože i krzna;
  - 14) nuklearni objekti;
  - 15) dalekovodi;
  - 16) trafostanice napona 110 kV i više;
  - 17) aerodromi za javni saobraćaj, željezničke pruge za javni saobraćaj sa objektima;
  - 18) međunarodni i magistralni kapaciteti u oblasti sistema veza zaključno sa međunarodnom automatskom centralom;
  - 19) brzi šinski sistemi;
  - 20) stadioni kapaciteta preko 5.000 gledalaca;
  - 21) pokriveni objekti za javne potrebe u kojim se okuplja više od 2.000 lica;
  - 22) objekti konstruktivnog raspona 30 i više metara;
  - 23) silosi kapaciteta 10.000 m<sup>3</sup> i više;
  - 24) objekti sa ugrađenom posebnom tehnologijom;
  - 25) fabrika vode;
  - 26) elektrana;
  - 27) međunarodni i magistralni cjevovod koji služi za transport nafte, plina ili naftnih derivata uključivo na terminal;
  - 28) otpremna i mjerna stanica, kada se grade kao cjelina;
  - 29) složene saobraćajne građevine poput autoputa i magistralnog puta;
  - 30) građevina željezničke infrastrukture;
  - 31) riječna luka i aerodrom kada se grade kao cjelina;
  - 32) složena proizvodno-industrijska građevina poput građevine za proizvodnju hemikalija i hemijskih proizvoda, proizvodnju metala, proizvodnju nemetala, koksa, cementa, stakla;
  - 33) rafinerija nafte;
  - 34) brodogradilište za brodove 1000 GT i više;
  - 35) toranj visine preko 25 metara;
  - 36) fabrika sa postrojenjima za koje je potrebna ekološka dozvola;
  - 37) tunel i slično;
- f) „**objekti standardne konstrukcije**” predstavljaju:
- 1) objekte građene klasičnim ili montažnim načinom gradnje, čiji rasponi konstrukcije nisu veći od 30 metara;
  - 2) objekti visokogradnje visine do 25 m;
  - 3) mostovi i propusti raspona do 25 metara;
  - 4) stadioni kapaciteta ispod 5.000 gledalaca;
  - 5) ostali objekti koji nisu svrstani u složene objekte;
- g) „**objekti jednostavne konstrukcije**” predstavljaju:
- 1) objekte klasične gradnje, čiji su rasponi konstrukcije manji od dvanaest metara;
  - 2) objekti visokogradnje spratnosti do Po+2+Pk i 15 metara visine;

- 3) objekti manje složenosti konstrukcijskih sistema najvećeg raspona do šest metara;
  - 4) putevi ranga ispod regionalnog;
  - 5) prilazi;
  - 6) uređenja terena i slobodnih površina;
  - 7) nasute brane do 10 metara visine;
  - 8) objekti za koje nije potrebno odobrenje za građenje;
- h) „**ukupan broj etaža**” obuhvata sve podzemne i nadzemne etaže na objektu uključujući potkrovlja i mansarde;
- i) „**bruto građevinska površina**” predstavlja bruto površinu osnove svake etaže, zajedno sa zidovima, pomnoženu sa brojem etaža;
- j) „**licenca**” predstavlja licencu izdatu u skladu sa Pravilnikom o davanju ovlaštenja fizičkim licima za projektovanje, građenje, nadzor nad građenjem i reviziju projektne dokumentacije;
- k) „**pravo obavljanja djelatnosti u okviru licenci**” predstavlja pravo obavljanja samo onih radova koji su određeni i limitirani licencom prema Pravilniku o davanju ovlaštenja fizičkim licima za projektovanje, građenje, nadzor nad građenjem i reviziju projektne dokumentacije;
- l) „**Registar**” je baza podataka koja sadrži podatke i isprave o subjektima upisa koji su obavezni registrovati se u skladu sa odredbama Zakona o registraciji poslovnih subjekata u Brčko Distriktu BiH;
- m) „**izvod iz Registra**” je ovjerena isprava koja se izdaje na zahtjev zainteresovanog lica na propisan način koja sadrži podatke koji se nalaze u Glavnoj knjizi Registra.

## DIO DRUGI

### GLAVA I. USLOVI ZA IZRADU TEHNIČKE DOKUMENTACIJE, REVIZIJU TEHNIČKE DOKUMENTACIJE I NADZOR NAD GRAĐENJEM

#### Član 3.

##### (Uslovi za izradu tehničke dokumentacije)

Uslovi za obavljanje djelatnosti izrade tehničke dokumentacije za pravno lice su da:

- a) je registrovano za obavljanje arhitektonske i inženjerske djelatnosti i tehničko savjetovanje;
- b) u radnom odnosu, na neodređeno vrijeme, ima najmanje jedno lice koje posjeduje licencu za izradu tehničke dokumentacije;
- c) je vlasnik ili po nekom drugom pravnom osnovu koristi poslovni prostor, koji ispunjava minimalne tehničke uslove iz člana 6. ovog pravilnika.

#### Član 4.

##### (Uslovi za reviziju tehničke dokumentacije)

Uslovi za obavljanje djelatnosti revizije tehničke dokumentacije za pravno lice su da:

- a) je izvršen upis arhitektonske i inženjerske djelatnosti i tehničko savjetovanje u Registar;
- b) u radnom odnosu, na neodređeno vrijeme, ima najmanje jedno lice koje posjeduje licencu za reviziju tehničke dokumentacije;
- c) je vlasnik ili po nekom drugom pravnom osnovu koristi poslovni prostor, koji ispunjava uslove za obavljanje djelatnosti revizije tehničke dokumentacije u skladu sa članom 6. ovog pravilnika.

#### Član 5.

##### (Uslovi za nadzor nad građenjem)

Uslovi za obavljanje djelatnosti nadzora nad građenjem za pravno lice su da:

- a) je izvršen upis arhitektonske i inženjerske djelatnosti i tehničko savjetovanje u Registar;
- b) u radnom odnosu, na neodređeno vrijeme, ima najmanje jedno lice koje posjeduje licencu za nadzor nad građenjem;
- c) je vlasnik ili po nekom drugom pravnom osnovu koristi poslovni prostor, koji ispunjava uslove za obavljanje djelatnosti nadzora nad građenjem u skladu sa članom 6. ovog pravilnika.

#### **Član 6. (Minimalni tehnički uslovi)**

(1) Minimalni tehnički uslovi za poslovni prostor za obavljanje djelatnosti izrade tehničke dokumentacije, revizije tehničke dokumentacije, građenja i nadzora nad građenjem su da:

- a) je za poslovni prostor izdato odobrenje za upotrebu u skladu sa Zakonom o prostornom planiranju i građenju;
- b) je namjena poslovnog prostora kancelarija;
- c) posjeduje sanitarni čvor;
- d) čini zasebnu funkcionalnu cjelinu;
- e) je visina prostorije poslovnog prostora, od poda do plafona, najmanje 2,50 metra i da po zaposleniku ima najmanje 12,5 metara kubnih zračnog prostora ili 4 metra kubna radne površine;
- f) ima istaknut naziv pravnog lica.

(2) Uslove iz stava (1) ovog člana mora ispunjavati i sjedište pravnog lica.

## **GLAVA II. USLOVI ZA OBAVLJENJE DJELATNOSTI GRAĐENJA**

#### **Član 7. (Opći uslovi)**

Opći uslovi za obavljanje djelatnosti građenja za pravno lice su da:

- a) je registrovano za obavljanje odgovarajuće djelatnosti iz područja građevinarstva;
- b) u radnom odnosu, na neodređeno vrijeme, ima potreban broj lica sa licencom odgovornog izvođača radova, čije licence su izdate za djelatnost koja je predmet zahtjeva iz člana 16. Pravilnika;
- c) je vlasnik ili po nekom drugom pravnom osnovu koristi poslovni prostor, koji ispunjava minimalne tehničke uslove iz člana 6. ovog pravilnika;
- d) da u radnom odnosu na neodređeno vrijeme ima minimalan broj zaposlenih kvalifikovanih radnika u skladu sa ovim pravilnikom.

#### **Član 8. (Posebni uslovi za pripremne radove)**

Posebni uslovi za pravno lice koje se bavi izvođenjem pripremnih radova, rušenjem objekata, razbijanjem objekata i zemljanih radova u građevinarstvu su da u radnom odnosu na neodređeno vrijeme ima jedno lice sa najmanje SSS koje posjeduje licencu odgovornog izvođača radova i dva kvalifikovana radnika građevinske struke.

#### **Član 9. (Posebni uslovi za visokogradnju)**

Posebni uslovi za pravno lice koje se bavi građenjem objekata, odnosno izvođenjem radova u visokogradnji, kompletnih objekata ili njihovih dijelova, u zavisnosti od veličine i složenosti objekata kao i vrste konstruktivnog sistema su da:

- a) za građenje objekata složene konstrukcije ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova,
  - 2) jedno lice sa najmanje VŠS sa licencom odgovornog izvođača radova,
  - 3) jedno lice sa najmanje SSS sa licencom odgovornog izvođača radova i
  - 4) 60 kvalifikovanih radnika građevinske struke;
- b) za građenje objekata, odnosno izvođenje radova na objektima standardne konstrukcije, bruto građevinske površine preko 1.500 metara kvadratnih i ukupne spratnosti više od pet etaža ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova,
  - 2) jedno lice sa najmanje SSS sa licencom odgovornog izvođača radova i
  - 3) 30 kvalifikovanih radnika građevinske struke;
- c) za građenje objekata, odnosno izvođenje radova na objektima standardne konstrukcije, bruto građevinske površine do 1.500 metara kvadratnih i ukupne spratnosti do pet etaža ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova i
  - 2) najmanje 15 kvalifikovanih radnika građevinske struke;
- d) za građenje objekata, odnosno izvođenje radova na objektima jednostavne konstrukcije i bruto građevinske površine do 700 metara kvadratnih ima u radnom odnosu na neodređeno vrijeme najmanje:
  - 1) jedno lice sa najmanje VŠS sa licencom odgovornog izvođača radova i
  - 2) sedam kvalifikovanih radnika građevinske struke;
- e) za građenje objekata, odnosno izvođenje radova na stambenim i poslovno-stambenim objektima jednostavne konstrukcije i bruto građevinske površine do 300 metara kvadratnih ima u radnom odnosu na neodređeno vrijeme najmanje:
  - 1) jedno lice sa najmanje SSS sa licencom odgovornog izvođača radova i
  - 2) tri kvalifikovana radnika građevinske struke;
- f) za održavanje objekata visokogradnje, postavljanje krovnih konstrukcija, pokrivanje krovova i hidroizolacione radove ima u radnom odnosu na neodređeno vrijeme najmanje:
  - 1) jedno lice sa najmanje SSS sa licencom odgovornog izvođača radova i
  - 2) dva kvalifikovana radnika građevinske struke.

#### **Član 10.**

##### **(Posebni uslovi za izolacijske i završne radove u građevinarstvu)**

Posebni uslovi za pravno lice koji se bavi izvođenjem izolacijskih i završnih radova u građevinarstvu su da:

- a) ako se bavi sa više od dvije vrste završnih radova u građevinarstvu ima u radnom odnosu na neodređeno vrijeme najmanje:
  - 1) jedno lice sa najmanje VŠS sa licencom odgovornog izvođača radova i
  - 2) po jednog kvalifikovanog radnika odgovarajuće struke za svaku vrstu radova;
- b) ako se bavi sa najmanje dvije vrste završnih radova ima u radnom odnosu na neodređeno vrijeme najmanje:
  - 1) jedno lice sa najmanje SSS sa licencom odgovornog izvođača radova i
  - 2) po jednog kvalifikovanog radnika odgovarajuće struke.

#### **Član 11.**

##### **(Posebni uslovi za instalacijske radove)**

Posebni uslovi za pravno lice koji se bavi izvođenjem instalacija vodovoda i kanalizacije, mašinskih, elektro i drugih instalacija su:

- a) za instalacijske radove u svim vrstama objekata ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova,
  - 2) jedno lice sa najmanje SSS sa licencom odgovornog izvođača radova i
  - 3) šest kvalifikovanih radnika odgovarajuće struke;
- b) za instalacijske radove u objektima standardne konstrukcije i bruto površine 2.000 metara kvadratnih ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova i
  - 2) četiri kvalifikovana radnika odgovarajuće struke;
- c) za instalacijske radove u objektima standardne konstrukcije i bruto površine 1.000 metara kvadratnih ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova i
  - 2) dva kvalifikovana radnika odgovarajuće struke;
- d) za instalacije u objektima standardne konstrukcije i bruto površine 400 metara kvadratnih ima u radnom odnosu na neodređeno vrijeme najmanje:
  - 1) jedno lice sa najmanje SSS sa licencom odgovornog izvođača radova i
  - 2) jednog kvalifikovanog radnika odgovarajuće struke.

## **Član 12.** **(Posebni uslovi za izgradnju objekata niskogradnje)**

Posebni uslovi za pravno lice koje se bavi građenjem objekata niskogradnje, kompletnih objekata ili njihovih dijelova, odnosno izvođenjem radova u oblasti niskogradnje su:

- a) za izgradnju autoputeva, tunela i podzemnih željeznica ima u radnom odnosu na neodređeno vrijeme najmanje:
  - 1) dva lica sa najmanje VSS sa licencom odgovornog izvođača radova,
  - 2) jedno lice sa najmanje VSS sa licencom odgovornog izvođača radova,
  - 3) dva lica sa najmanje SSS sa licencom odgovornog izvođača radova,
  - 4) deset rukovalaca građevinskim mašinama i
  - 5) 40 kvalifikovanih radnika građevinske struke;
- b) za izgradnju puteva do kategorije magistralnih, mostova sa više raspona, vijadukta, aerodromskih pista i sportskih terena ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova;
  - 2) jedno lice sa najmanje SSS sa licencom odgovornog izvođača radova;
  - 3) osam rukovalaca građevinskim mašinama i
  - 4) 20 kvalifikovanih radnika građevinske struke;
- c) za izgradnju magistralnih puteva, regionalnih puteva, gradskih saobraćajnica, lokalnih puteva, jednorasponskih mostova, vijadukta, željezničkih pruga i sportskih terena ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova,
  - 2) dva lica sa najmanje SSS sa licencom odgovornog izvođača radova,
  - 3) pet rukovalaca građevinskim mašinama i
  - 4) deset kvalifikovanih radnika građevinske struke;
- d) za izgradnju nekategorisanih puteva, redovno održavanje objekata niskogradnje, izgradnju biciklističkih staza, pješačkih staza, sportskih terena, montažu i podizanje konstrukcija na gradilištu od prethodno izrađenih dijelova ima u radnom odnosu na neodređeno vrijeme najmanje:
  - 1) jedno lice sa najmanje VSS građevinske struke sa licencom za građenje,
  - 2) jedno lice sa najmanje SSS sa licencom odgovornog izvođača radova,

- 3) dva rukovaoca građevinskim mašinama i
- 4) pet kvalifikovanih radnika građevinske struke;
- e) za instalacijske radove, za građenje objekata magistralnih cjevovoda, elektroenergetskih i komunikacijskih linija ima u radnom odnosu na neodređeno vrijeme najmanje:
  - 1) jedno lice sa najmanje VSS sa licencom odgovornog izvođača radova,
  - 2) jedno lice sa najmanje SSS sa licencom odgovornog izvođača radova,
  - 3) tri rukovaoca građevinskim mašinama i
  - 4) osam kvalifikovanih radnika građevinske struke;
- f) za građenje objekata gradskih cjevovoda, elektroenergetskih i komunikacijskih linija ima u radnom odnosu na neodređeno vrijeme najmanje:
  - 1) jedno lice sa najmanje VŠS sa licencom odgovornog izvođača radova,
  - 2) jedno lice sa najmanje SSS sa licencom odgovornog izvođača radova,
  - 3) dva rukovaoca građevinskim mašinama i
  - 4) pet kvalifikovanih radnika građevinske struke za instalacijske radove.

### **Član 13.**

#### **(Posebni uslovi za izgradnju hidrograđevinskih objekata)**

Posebni uslovi za pravno lice koje se bavi građenjem objekata u oblasti hidrogradnje, odnosno izvođenjem radova u oblasti hidrogradnje, kompletnih objekata ili njihovih dijelova, kao i održavanjem tih objekata su da u radnom odnosu na neodređeno vrijeme ima najmanje:

- a) jedno lice sa najmanje VSS sa licencom odgovornog izvođača radova,
- b) tri rukovaoca građevinskim mašinama i
- c) najmanje šest kvalifikovanih radnika građevinske struke.

### **Član 14.**

#### **(Posebni uslovi za građevinske radove koji zahtijevaju specijalno izvođenje ili opremu)**

Posebni uslovi za pravno lice koje se bavi izvođenjem specijalnih radova, koji zahtijevaju specijalno izvođenje ili opremu, su da u radnom odnosu na neodređeno vrijeme ima najmanje:

- a) jedno lice VSS sa licencom odgovornog izvođača radova,
- b) dva kvalifikovana građevinska radnika u stalnom radnom odnosu.

## **GLAVA III. NADLEŽNOST ZA DONOŠENJE RJEŠENJA, FORMA I SADRŽAJ ZAHTJEVA**

### **Član 15.**

#### **(Početak rada)**

Pravno lice može početi sa izradom tehničke dokumentacije, revizijom tehničke dokumentacije, građenjem i nadzorom kada Odjeljenje za javnu sigurnost (u daljnjem tekstu: „Odjeljenje“) donese rješenje kojim se utvrđuje ispunjenost uslova za obavljanje djelatnosti.

### **Član 16.**

#### **(Zahtjev)**

(1) Rješenje iz člana 15. ovog pravilnika izdaje se na zahtjev koji pravno lice podnosi Odjeljenju.

(2) Zahtjev iz stava (1) ovog člana sadrži:

- a) naziv pravnog lica,

- b) adresu sjedišta,
- c) vrstu djelatnosti za čije obavljanje se podnosi zahtjev i
- d) kontakt telefon, faks i e-mail.

(3) Ukoliko više pravnih lica zaključi ugovor radi ispunjavanja uslova za obavljanje djelatnosti građenja, zahtjev iz stava (1) ovog člana podnosi pravno lice koje je ugovorom određeno da nastupa u ime ostalih pravnih lica.

#### **Član 17. (Prilozi uz zahtjev)**

(1) Uz zahtjev iz člana 16. ovog pravilnika prilaže se:

- a) izvod iz Registra;
- b) dokazi o ispunjavanju uslova utvrđenih Pravilnikom.

(2) Pravno lice iz člana 16. stav (4) ovog pravilnika dužno je, osim priloga iz stava (1) ovog člana, uz zahtjev podnijeti i ugovor iz člana 16. stav (4) ovog pravilnika.

#### **Član 18. (Rješenje)**

(1) Rješenje iz člana 15. ovog pravilnika donosi šef Odjeljenja.

(2) Rješenje sadrži:

- a) šifru djelatnosti određenu u skladu sa Odlukom o klasifikaciji djelatnosti u Brčko Distriktu BiH;
- b) oblast građenja;
- c) vrstu radova.

(3) Pravno lice dužno je podnijeti zahtjev za izdavanje novog rješenja kojim se utvrđuje ispunjenost uslova za obavljanje djelatnosti ukoliko je tokom poslovanja došlo do promjene djelatnosti iz stava (2) ovog člana.

### **GLAVA IV. OBAVLJANJE DJELATNOSTI**

#### **Član 19. (Obavljanje djelatnosti u okviru ovlaštenja licence fizičkog lica)**

(1) Za obavljanje djelatnosti iz člana 1. ovog pravilnika pravno lice dužno je imati u radnom odnosu lice sa licencom i može obavljati djelatnost u okviru ovlaštenja datog licencom zaposlenog lica.

(2) Ako pravno lice, pored djelatnosti za koje ima u radnom odnosu lice sa odgovarajućom licencom, obavlja i druge djelatnosti iz člana 1. ovog pravilnika za koje nema lice u radnom odnosu sa potrebnom licencom, može zaključiti ugovor sa pravnim licem koje ima pravo obavljanja djelatnosti u skladu sa ovim pravilnikom.

(3) U ugovoru iz stava (2) ovog člana obavezno se navodi period angažovanja i vrsta poslova.

#### **Član 20. (Pravna lica sa sjedištem van Distrikta)**



(1) Pravna lica sa sjedištem van Distrikta, a koja obavljaju djelatnost na teritoriji Distrikta, za izradu tehničke dokumentacije, reviziju tehničke dokumentacije, građenje i nadzor dužni su posjedovati rješenje o ispunjavanju uslova za obavljanje djelatnosti u skladu sa ovim pravilnikom.

(2) Pravna lica iz stava (1) ovog člana kao dokaz o ispunjavanju minimalnih tehničkih uslova iz člana 6. ovog pravilnika prilažu akt o namjeni poslovnog prostora koji izdaje nadležni organ u mjestu sjedišta pravnog lica.

#### **Član 21. (Poslovne jedinice)**

Poslovna jedinica pravnog lica sa sjedištem u Distriktu rješenje dobija u redovnom postupku u skladu sa ovim pravilnikom.

### **DIO TREĆI**

#### **Član 22. (Obaveza usklađivanja poslovanja pravnih lica)**

Pravna lica iz člana 1. ovog pravilnika dužna su svoje poslovanje uskladiti sa odredbama ovog pravilnika u roku od 90 dana od dana stupanja na snagu Pravilnika.

#### **Član 23. (Stupanje na snagu)**

Ovaj pravilnik stupa na snagu danom donošenja i objavljuje se u „Službenom glasniku Brčko Distrikta BiH“.

#### **DOSTAVLJENO:**

1. Članovima Vlade Brčko Distrikta BiH,
2. Odjeljenju za javnu sigurnost,
3. Odjeljenju za prostorno planiranje i imovinsko-pravne poslove,
4. Inspektoratu,
5. Direkciji za finansije Brčko Distrikta BiH,
6. Uredu za upravljanje javnom imovinom,
7. Uredu koordinatora Brčko Distrikta BiH u Vijeću ministara BiH,
8. Sektoru za koordinaciju politika i opće poslove  
- Odsjeku za opće poslove,
9. „Službenom glasniku Brčko Distrikta BiH“,
10. Arhivi.

#### **GRADONAČELNIK**

**dr. Dragan Pajić**